

Indigens interessats pella zona Resgia Chapella

Quist utuon saran glivradas las lavuors preparatorias

DA FLURIN ANDRY / ANR

■ Per pussibiltar a famiglias giuvnas indigenas da fabricar a S-chanf ha il cumün s-chaffi il prim üna zona da fabrica per indigens in cumün e lura a Chapella. Da las 14 parcelas plus il magazin s'haja vendü quatter. Causa cha'ls predschs per terrain da fabrica sun in Engiadina vieplü chars s-chaffischan divers cumüns zonas da fabrica per indigens. Eir a S-chanf es quai stat il cas: I'ls ultims vainch ons ha il cumün pussibiltà ad üna buna dunzaina da persunas da fabricar üna chasa e da restar uschea in cumün. «I' quartier Davos Chesas vaiva il cumün da S-chanf s-chaffi üna zona da fabrica per indigens», as regorda il president cumünal Gian Fadri Largiadèr, «là s'haja vendü tuot las parcelas.» Indigens sun, sco ch'el definischa, persunas oriundas da S-chanf o persunas chi abitan qua daspö almain tschinch ons. L'interess per terrain da fabrica pajabel es però restà grond a S-chanf.

Examinà ün'ulteriura zona sün terrain cumünal

«Siond cha' cumün survgniva eir davo la surfabricaziun dal quartier Davos Chesas suvent dumondas d'indigens per ulteriur terrain da fabrica favuraivel ha il cussagl cumünal examinà ingio cha quai füss amo pussibel», cuntinuescha Largiadèr. La resgia da S-chanf chi'd es uossa a Boschetta Plauna as rechattaiva plü bod a Chapella. «Quist terrain es proprietà dal cumün, uschea ha il cussagl cumünal analisà la situaziun ed ha vis chi füss pussibel da s-chaffir qua üna seguonda zona da fabrica per indigens», declera il president cumünal. Per far quai ha il cumün da S-chanf il prim stuvü reverder total-



Vista da la zona Resgia Chapella vers süd.

FOTO CUMÜN DA S-CHANF

maing sia planisaziun locala. Da l'on 2013 ha la radunanza cumünala approvà quista revisiun ed aderi uschea eir a la nouva zona da fabrica per indigens a Chapella.

Acceptà eir il credit per l'access e l'infrastructura

Duos ons plü tard la ha radunanza cumünala acceptà il credit dad 1,7 milliuns francs per preparar la zona per indigens. «Davo avair fat il plan da quartier s'haja cumanzà a fabricar l'infrastructura ne-

cessaria per quist nouv quartier», declera il president cumünal, «uossa eschna landervia a finir quistas lavuors, d'utuon glivraina amo las vias da quartier e tillas catramain. Quai sun las ultimas lavuors cha' cumün ha da prestar per quista zona.» In tuot cumpiglia la zona Resgia Chapella 14 parcelas e l'anteriur magazin da la resgia. Vendü ha il cumün fin uossa trais parcelas, i sun gnüdas fabricadas duos chasas. «Eir il magazin vegl han cumprà duos persunas giuvnas chi lessan fabricar intuorn il stabel per abi-

tar laint», infuormescha Gian Fadri Largiadèr, «ellas lascharan far prosammaing ün proget per verer che pussibilitats chi existan in quist antierur magazin da la resgia.»

«Grond plaschair da l'interess pella zona a Chapella»

Chapella es üna fracziun dal cumün da S-chanf. La zona Chapella Resgia as rechatta, sco cha' il president cumünal declera, güst al cumanzamaint da la Val Sausauna. «Nus vain adüna darcheu dumon-

das in connex cun quista zona da fabrica a Chapella», cuntinuescha' e disch cha quai saja per gronda part glied giuvna chi less forza cumprar in futur üna da quistas parcelas per fabricar lasura üna chasa. «Nus vain grond plaschair cha glied chi'd es creschüda sù a S-chanf o chi abita qua daspö tschinch ons e daplü demuossa interess per üna da quistas parcelas», conclüda il president cumünal da S-chanf, «uschea po il cumün contribuir sia part per cha famiglias giuvnas indigenas possan as prestar da fabricar a S-chanf e restar uschea in cumün e fracziuns.»

Zona sumglianta eir i'l cumün vaschin

Eir il cumün da Zuoz ha s-chaffi üna zona da fabrica per indigens. Quella as rechatta, sco chi disch il chanzlist da Zuoz Claudio Duschletta, a Mariöl, güsta sur il cumün. Ella cumpiglia quatter parcelas. «Duos da quella vaina pudü vender, üna es eir fin-già surfabricada», manzuna il chanzlist. I's tratta tenor el da parcelas per indigens, abitants da Zuoz, o per persunas chi lessan gugent gnir indigens, tour domicil in cumün. «A Zuoz nun esa acut, ma id es istess adüna da star attent cha la glied giuvna resta in cumün», manzuna Duschletta, «cun da quistas zonas as voula dar a famiglias giuvnas la pussibiltà da cumprar üna parcella e tilla surfabricar, uschea mantegna il cumün seis abitants o survain perfin novas persunas chi piglian domicil a Zuoz.»


Tschinch istorgias cul cumissari Nuot Nes

Nouv cudesch cun raquints criminals

■ (anr/afi) L'Engiadin'Ota es per Attilio Bivetti üna regiun cun ün vast public e chi dà üna gronda libertà per inventar istorgias. In seis seguond cudesch cuntinua el cun seis raquints criminals. Il cumissari Nuot Nes e seis assistent Marco Mangiù sun darcheu activs. In seis seguond tom cun raquints criminals lascha cuntinuar Attilio Bivetti ils cas criminals in Engiadin'Ota. Eir el piazza sias istorgias in vicinanza dal «Top of the World», quai sco cha eir oters scriptuors rumantschs han fat. Tanter dad els sun quai Reto Caratsch cun «Il commissari da la cravatta verda», Göri Klaingutì cun «Linard Lum» o lura Flurin Spescha cun «Fieu e flomma».

«L'Engadin'Ota ha ün vast public»

I' epilog dal nouv cudesch «L'angel da Nuot Nes» dad Attilio Bivetti, cumparü



«L'angel da Nuot Nes» dad Attilio Bivetti es cumparü pro la Chasa Editura Rumantscha.

FOTO CHASA EDITURA RUMANTSCHA

pro la Chasa Editura Rumantscha, manzuna la romanista Annetta Ganzoni cha l'Engiadin'Ota para dad esser per las lecturas e'ls lectuors rumantschs la regiun la plü privlusa. Eir las novas istorgias cun il cumissari Nuot Nes e seis assistent muossan situaziuns dramaticas immez ils prüvats cumüns da l'Engiadin'Ota. Ils tschinch cas cha'ls duos criminalists han da schoglier quista vouta dan a las lecturas e'ls lectuors la pussibiltà d'entrar illas profuonditats incuntschaintas dals ambiants renomnats. Adonta da sia età ha Nuot Nes fat amicizcha cul muond virtual. Quai pervi cha la collavuraziun culs specialists da computer es güsta uschè importanta sco quella cul labor forensic. «L'Engiadin'Ota es üna regiun cun ün vast public e cun quai n'haja adüna üna gronda libertà per mias istorgias», disch Bivetti, e: «Il spectrum tendescha dal pauret cun sias desch vachas fin als milliunaris chi dan oura in ün di tant sco cha oters guadognan in ün on.» Tenor el as doda adüna darcheu l'üna o l'otra istorgia da la società dals richs e cun ün pa fantasia naschan landroura novas istorgias.

La sfida d'inventar istorgias

Bivetti es nat da l'on 1945 a Vicosoprano ed ha passantà si'infanzia a Samedan ed a San Galla. Dürant seis stüdi da veterinari ha'l lavurà sco assistent a l'Università da Turich ed a Malögia. Dal 1974 dvainta el veterinari per l'Engiadin'Ota e la Bergiaglia ed ha pratichà fin da l'on 2006. Sia actività politica i'l cumün da Segl ha'l conclüsch sco president cumünal. Daspö sia pensiuon viva el tanter Segl, Fex e Castasegna. A scriver ha cumanzà Bivetti da l'on 2006. «Las istorgias vegnan simplamaing adimaint e cur chi sun madüras tillas scriva lura sù», manzuna



Attilio Bivetti ha scrit ulteriurs raquints criminals cul cumissari Nuot Nes.

FOTO T. DEFLLA

l'autur da l'Engiadin'Ota. Minchatant daja eir quels mumaints cha seis protagonist principal, Nuot Nes, riva pro el e til dà ün stempel da scriver inavant l'istorgia. «Eu scriv istorgias chi quintan simplamaing da la vita e da las experiencias dal temp ch'eu pratichaiva.» Il quintar istorgias d'eira dvantà in sia famiglia tradiziun. «La sfida es d'inventar istorgias e da verer scha'ls audituors crajan quellas», disch Bivetti. E causa ch'el nun ha uossa plü ingün public chi taidla sias istorgias

ha'l cumanzà da tillas metter sün palperi. Plünavant ha'l tradi cha Nuot Nes gaja a la fin dals raquints in pensiuon e cun quai sun finidas las istorgias dal cumissari e da seis assistent puschlavin. «Eu sun da l'avis chi nu füss da strapatschar massa ferm seis protagonist important e perquai n'haja decis cha quist sun seis ultims cas criminals.» Bivetti svesa però nu schmettarà da scriver istorgias. «Adüna cur ch'ün cudesch es in elavuraziun e fin cur cha'l es cumparü nu suna bun da scriver»,

tradischa'l. I douva lura darcheu seis temp fin cha l'ün o l'oter protagonist da las novas istorgias riva pro el a til dar il stempel bsögnaivel.

La vernissascha da «L'angel da Nuot Nes» es in mardi, ils 3 october e cumainza a las 20.00 il-la Biblioteca Engiadinaisa a Segl. Attilio Bivetti prelegia da seis nouv cudesch, Annetta Ganzoni moderescha e Pius Baumgartner pissera pel trategnimaint musical. Il cudesch po gnir retrat illas librerias o pro www.chasaeditura.ch.